

*Ang
Perpektong Dulot
sang Dios*

(Ilonggo Version)



R. B. THIEME, JR.

With permission of R. B. Thieme, Jr., Bible Ministries,
this publication is distributed in the Philippines
by Grace Logos Support Philippines, Inc.,
without charge or obligation.

For more information text or call:

*(Ginhatag pinaagi sa GLSP nga wala sing bayad ukon bligasyon.
Para sa dugang pa nga kasayuran mag-text ukon magtawag sa:)*

email: jersal1978@yahoo.com (Visayan)

Smart: 0920-218-3668 (Visayan)

email: naconasg@yahoo.com (Ilonggo)

Smart: 0970-034-3191 (Ilonggo)

The electronic version of this book can be read or downloaded
through the Internet address <https://www.gracelsp.ph>.

*(Ang sa electronic nga porma sang sini nga libro mahimong mabasa ukon ma-download
pinaagi sa internet address nga <https://www.gracelsp.ph>.)*

ANG PERPEKTONG DULOT SANG DIOS

R. B. THIEME, JR.



R. B. THIEME, JR., BIBLE MINISTRIES
HOUSTON, TEXAS

Ini nga libro gin-edit halin sa mga paathag kag wala nabantala nga mga sinulat ni R. B. Thieme, Jr.

Luwas kon wala masambit, ang tanang Balaan nga mga Kasulatan sa sini nga libro mga ginkutlo halin sa New American Standard Bible (NASB). Yadtong ginmarkahan “KJV” mga ginkutlo halin sa King James Version. Ang kinorsetihan nga komentaryo nagapaathag sing pagpasangkad sang NASB nga pagbadbad nga gintudlo sa mga paathag sa pagklase sa Bibliya (nga nakahanda na sa MP3 CD sa R, B, Thieme, Jr., Bible Ministries, Houston, Texas).

Unang ginbantala subong *God's Perfect Gift*

© 2004, ni R. B. Thieme, Jr. Ang tanan nga mga katungud ginreserba.

Ika-apat nga impresyon 2019

Ini nga libro gin-andam pag-imprenta halin sa mga panudlo kag wala nabantala nga mga sinulat nga mensahe ni R. B. Thieme, Jr.

Ang Katalogo sang Pagtolon-an nga mga Pagtoon sa Bibliya (sa English) igasangkap sa tion nga pangayoon, magpahibalo sa:

R. B. Thieme, Jr., Bible Ministries

P. O. Box 460829, Houston, Texas 77056-8829

www.rbthieme.org

Wala sang bahin sining bantalaan nga basi ginpahimo liwat ukon ginpadala sa bisan ano man nga porma ukon sa bisan ano man nga pamaagi, elektronika ukon minakina, lakip ang potograpiya, rekording, ukon bisan ano man nga mga pahibalo nahanungud sa pagtipig kag pamaagi sang pagkuha kag pagpadala, sang wala pagtugot paagi sa sulat halin sa tagbantala.

Gin-imprenta sa Tagbilaran City, Bohol, Philippines, 2025

Ginbadbad kag gin-andam sa pagpaimprenta ni

Gloria Estanda Naconas

Ginrepaso nila Alma Avila Cachopero

kag Dante Mallorca Canja

Gin-imprenta nga may pagtugot sang

R. B. Thieme, Jr., Bible Ministries.

ANG PERPEKTONG DULOT SANG DIOS

ANG PASKO AMO ANG ISA KA KATINGALAHAN NGA OKASYON para sa paghatag sang mga dulot. Apang ang pinakadako nga dulot sa tanan amo ang isa nga gintagna ni Isaias sa nagligad nga mga siglo. “Kay sa aton natawo ang isa ka bata, sa aton ginhatag ang isa ka anak nga lalaki” (Isaias 9:6, KJV). Si Jesu-Kristo amo ang perpektong dulot sang Dios sa tanang katawhan—ang sekreto sa kada pakamaayo kag kada kalipay para sa sini nga tinion kag para sa bug-os nga

eternidad. Kon pilion mo nga batonon ang Iya dulot, niyan makabaton ka kag makaangkon sang walay katapusan nga kaluwasan. Apang bisan pa sina, indi mo gid matalupangdan ang dakong bili sang sini nga dulot tubtub mahangpan mo anay ang grasya sang Dios.

Halin sa pagkalabaw nga kamandoan sang pagbuut sang Dios nag-abot ang divine nga plano nga gintawag “Operasyon Grasya.” Walay bisan isa nga makaagum ukon mangin-dapat sa bisan anong butang nga halin sa Dios. Apang sa Iya walay limitasyon nga gugma kag grasya, ang Dios hilway nga nagasangkap sang tagasa ka butang para sa aton agud makaangkon sing walay katapusan nga relasyon sa Iya (Mga Taga-Efeso 2:8–9). Ang plano sang Dios nahanungud sa grasya kag kamatuuran “maagum pinaagi kay Jesu-Kristo” (Juan 1:17), ang natawo sa pinasahi nga Anak sang Dios.

ANG DIOS-TAWO

Agud makilala ang Dios, kinahanglan makilala naton si Jesu-Kristo. Si Jesu-Kristo amo ang pinasahi nga persona sang bug-os kalibutan, ang Dios-tawo, ang walay buhin nga pagka-Dios kag matuud nga pagkatawo sa indi mabulag nga paghiusa sa isa ka persona sa walay katubtuban. Siya amo ang makit-an nga demonstrasyon kag manugpahayag sang indi makit-an nga Dios (Juan 1:18; Mga Hebreo 1:1–2). Si Jesu-Kristo amo ang perpektong dulot sang Dios para sa makasasala nga tawo.

Subong pagka-Dios, si Jesu-Kristo nagapanag-iya sang tanang divine nga kinaugalian: ang pagkalabaw nga kaman-doan, pagkamatarong, katarungan, gug-ma, kinabuhi nga walay katapusan, pagka-hibalo sang tanan, pagkagamhanan sa tanan, pagkaara bisan diin, pagkawalay

pagbaylo, kag kamatuuran. Si Jesu-Kristo amo ang manunuga kag manugsakdag sang bug-os kalibutan (Juan 1:3; Mga Taga-Colosas 1:16–17). Si Jesu-Kristo nagaanunsyo sang Iya walay katapusan nga pagkaara kag sang pagkapareho sa Dios nga Amay: “Ako kag ang Amay isa” (Juan 10:30).

- Nagatawag Siya sang tanang mga tawo pakadto sa Iya kaugalingon (Mateo 11:28a).
- Nagasaad Siya nga magpatawad sang mga sala (Marcos 2:10).
- Nagasaad Siya nga magpadala sang Balaan Espiritu (Juan 14:26; 15:26).
- Nagasaad Siya nga maghatag sing kapahuwayan kag paghidait (Mateo 11:28b; Juan 14:27).
- Nagasaad Siya nga maghatag sa tanang mga tumuluo sing kinabuhi nga walay katapusan kag sang nabanhaw

nga lawas (Juan 5:24; Mga Taga-Filipos 3:20–21).

Sa bug-os Balaan nga Kasulatan, ang tanang divine nga mga ngalan kag mga titulo ginhatag sa kay Jesu-Kristo. Dira sa Daan nga Katipan gintawag Siya nga *Yahweh* ukon “AKO AMO AKO”; sa Bag-ong Katipan “Dios,” “Ginoo,” “ang aton dungganong Dios,” “Dios, ang Makagagahum,” kag “HARI SANG MGA HARI, KAG GINOO SANG MGA GINOO” (Exodo 3:14; Juan 20:28; Mga Taga-Filipos 2:11; Tito 2:13; Bugna 19:6, 16).

Sa amo man nga tinion nga Siya amo ang walay katapusan nga Dios, si Jesu-Kristo sa Iya pagpakatawo nangin matud nga tawo (Juan 1:1, 4).

- Natawo Siya nga may tawhanong lawas, kalag, kag espiritu (Mga Hebreo 2:14; 1 Juan 4:2).

- Ang Iya lawas sa unud-kag-dugo may normal nga pagtubo, pagbatyag, kag mga aksyon (Lucas 2:52).
- May ara Siya sing tanang mga limitasyon sang tawo. Nag-antos Siya sing gutum, uhaw, sakit, kakapoy; nagkasadya Siya sang kalingawan kag pahuway (Mateo 4:2; 8:25; 9:10; Juan 19:28; Mga Taga-Filipos 2:6–7).
- Nag-antos Siya sang kamatayon kag nabanhaw (Mateo 16:21; 28:6; Juan 19:33)

Pinaagi sa sining pinasahi nga persona ni Krsisto, ang Dios sa Iya grasya nagpahayag sang Iya gugma para sa intero nga katawhan. Ang Iya gugma ginpakita sa aton pinaagi sa kay Jesu-Kristo nga nangin matuud nga tawo agud mangin aton halili kag magbayad sang silot tungud sang aton mga sala.

“Kay ginhigugma gid sang Dios ang kalibutan sa bagay nga ginhatag Niya ang Iya bugtong [natawo sing pinas-sahi] nga Anak, agud nga ang bisan sin-o nga nagatoo sa Iya indi mawala, kondi may kinabuhi nga walay katapusan.” (Juan 3:16)

Kon kita makaangkon sang kinabuhi nga walay katapusan, ang aton mga sala kinahanglan mapatawad kag mapanas. Si Jesu-Kristo wala mag-abot sa kalibutan sa paghimo lamang sang mga milagro, sa pagpahaganhagan sang pag-antos, ukon bisan sa pagtudlo sang walay katapusan nga mga palatukuran sang kinabuhi kag kamatayon, bisan pa nga nakahimo Siya sini tanan. Si Jesu-Kristo nag-abot para sa pagpahayag sang katuyoan nga mapatay didto sa krus tungud sang imo kag sang

akon mga sala, tungud sang mga sala sang intero kalibutan.

Subong nga ang Anak sang Tawo wala nagkadto diri agud alagaran kondi mag-alagad, kag agud maghatag sang Iya kinabuhi sa pagtubos sang madamo. (Mateo 20:28)

Kay si Kristo napatay man tungud sang mga sala sa makaisa lang gid, *ang* matarong tungud sa dimatarong, agud nga madala Niya kita sa Dios, nga ginpatay sa unud, apang ginbuhi sa espiritu. (1 Pedro 3:18)

Didto sa krus, si Jesu-Kristo naghimo sang kaluwasan kag nagatanyag Siya sang kinabuhi nga walay katapusan sa

kada isa nga magatoo sa Iya:

Kag nagahatag Ako sa ila sing kinabuhi nga walay katapusan, kag indi na gid sila mawala; kag walay isa nga makaagaw sa ila sa Akon kamut. (Juan 10:28)

Apang ini nasulat agud nga magtoo kamo nga si Jesus amo ang Kristo, ang Anak sang Dios, kag sa pagtoo may kinabuhi kamo sa Iya ngalan. (Juan 20:31)

Karon ang solo nga harambalon para sa walay katapusan nga relasyon sa Dios amo ang imo panghunahuna nahanungud sa persona ni Jesu-Kristo, ang perpektong dulot sang Dios. “Ano bala ang imo gina-hunahuna nahanungud kay Kristo?” (Mateo 22:42)

“Ang bisan sin-o nga nagatoo sa Anak may kinabuhi nga walay katapusan; apang ang bisan sin-o nga wala nagatuman [sa sugo nga magtoo] sa Anak indi makakita sang kinabuhi, kondi ang kasingkal sang Dios nagapabilin sa Iya.”
(Juan 3:36)

ANG BALABAG SA TUNGA SANG DIOS KAG TAWO

Sa pagligad sang mga binilyon ka mga tinuig, ang Dios nakahibalo nga “pinaagi sa pagkadimasinulundon sang tawo [Adan],” ang tawo mangin makasasala (Mga Taga-Roma 5:19). Kon ano ang nahibaloan sang Dios sadtong nagligad nga eternidad nangin isa ka reyalidad

sang si Adan nakahimo sang kinaunahang sala didto sa Hardin kag ang dako kaayo nga balabag naggowa sa tunga sang Dios kag tawo (Genesis 2:17; 3:6).

Busa, subong nga pinaagi sa isa ka tawo ang sala nagsulud sa kalibutan, kag ang [espirituhanon] kamatayon pinaagi sa sala, kag gani ang [espirituhanon] kamatayon naglaton sa tanang mga tawo, tungud kay ang tanan nakasala [sang si Adan nagpakasala]. (Mga Taga-Roma 5:12)

Ang pagkamatarong sang tawo gin-deklara nga mangin subong sang isa ka “dimatinlo nga bayo” sa itulolok sang Dios (Isaias 64:6). Samtang matuud gid nga ang iban nga mga tawo mas maayo kay sa iban pa, matuud man nga sa katawhan

ang tanang pagkamatarong diperpekto. Ang tawo sa iya tawhanong pagkamatarong indi gid makaangkon sang relasyon sa Dios nga perpekto, ang hingpit nga pagkamatarong. Busa, ang indi maagyan nga balabag ara sa tunga sang Dios kag tawo. Bisan pa nga sa bug-os nga mga kapanahonan ang tawo nagpangita pinaagi sa iya kaugalingong maayong mga binuhatan agud makaagum sang pagpanugot sang Dios kag magkuha sini nga balabag, walay tawo nga nagmadinalag-on bisan kasan-o (Tito 3:5). Walay trabaho ukon paghimulat sang bisan sin-o nga tawo nga makakuha sang balabag.

Ang balabag ginhimo pa gid nga indi masarangan gub-on sang pagkamatuud nga ang Dios sa Iya katarungan klaro gid kaayo nga nagpahayag sing silot sa sala: “ang bayad sa sala amo ang [espirituhanon] kamatayon” (Mga Taga-Roma

6:23a). Si Adan wala napatay sa lawas sa halos isa ka libo ka tuig sa tapos sang iya pagpakasala, kondi nga napatay siya dayon sa espiritu kag nahamulag sa Dios tungud sang espirituhanong kamatayon.

Bilang makasasala nga kaliwat ni Adan, ang tawo natawo nga buhi sa lawas apang patay sa espiritu. Ang espirituhanong patay nga tawo indi puwede makaangkon sang relasyon sa Dios bisan diin sa sini nga tinion ukon sa eternidad. Ang Dios nagpahinumdom nga daan kay Adan sa sini nga silot tungud sang sala didto sa Hardin.

“Apang halin sa kahoy sang ihibalo nahanungud sa maayo kag malaut indi ka magkaon, kay sa adlaw nga magkaon ka sini sigurado nga mapatay ka.”
(Genesis 2:17)

Sa palanan-awon sang tawo, ang balabag indi gid maagyan. Sa palanan-awon sang Dios, si Jesu-Kristo nagkuha sang balabag. Ang Dios nga Anak, ang Ikaduha nga Persona sang Tatlo ka mga Persona sa Isa ka Dios, nagsulud sa kalibutan kag nangin matuud nga tawo (Juan 1:14). Kapareho sa Dios kag kapareho sa tawo, apang bisan pa sina, walay sala ukon makasasala nga kinaiya, si Jesu-Kristo amo ang nagaisahanon nga kwalipikado nga magbulos sang makasasala kag sa amo man nga tinion magpakontento sang pagkamatarong kag katarungan sang Amay nga amo ang

. . . nagahandum nga ang tanan nga mga tawo maluwas kag makadangat sa pagkahibalo sang kamatuuran. Kay may isa ka Dios, kag isa ka manugpatunga man sa

tunga sang Dios kag mga tawo, *ang* tawo nga si Jesu-Kristo, nga naghatag sang Iya kaugalingon subong ang pangtubus para sa tanan, nga ang pagpamatuud *ginhatag* sa nagakaigo nga tinion. (1 Timoteo 2:4–6)

ANG PAGKUHA SANG BALABAG

Ang pagkuha sang balabag puwede sumahon sa isa ka pulong: pagpasag-uli sing buut.

Kay Siya ang Iya kaugalingon amo ang aton paghidait [pagpasag-uli sing buut], nga naghimo sining *mga grupo* sa isa, kag nagguba sang balabag

sang nagabahin nga pader . .
 . kag magpasag-uli sing buut
 nila sa isa ka lawas didto sa
 Dios pinaagi sa krus, paagi
 sini nagabutang sa kamatayon
 sang kaawayon [sa tunga

ANG BALABAG

SALA Isaias 64:6b; Mga Taga-Roma 3:23
SILOT SANG SALA Mga Taga-Roma 5:12; 6:23a
LAWASNONG PAGKABUN-AG Genesis 2:17; cf. Mga Taga-Roma 5:12; Mga Taga-Efeso 2:1
TAWHANONG PAGKAMATARONG Isaias 64:6a; Mga Taga-Roma 9:30–33
KARAKTER SANG DIOS Isaias 46:9b; cf. 64:6b; Mga Taga-Roma 6:8
KAHIMTANGAN SA KAY ADAN 1 Mga Taga-Corinto 15:22a

TRABAHO NI KRISTO ANG MANUGPATUNGA

PAGTUBOS Mga Taga-Efeso 1:7; 1 Pedro 1:18–19 WALAY LIMITASYON NGA PAGPAMAYAD 2 Mga Taga-Corinto 5:14–15; 1 Timoteo 4:10
PAGPAMAYAD SANG SALA Mga Taga-Colosas 2:14
PAGKATAWO LIWAT Juan 3:1–18
PAGPABANGUD 1 Mga Taga-Corinto 1:30; 2 Mga Taga-Corinto 5:21 PAGPAKAMATARONG Mga Taga-Roma 4:1–5; Mga Taga-Galacia 2:16
PAGPAKALMA Mga Taga-Roma 3:22–26; 1 Juan 2:2
KAHIMTANGAN KAY KRISTO 1 Mga Taga-Corinto 15:22b; 2 Mga Taga-Corinto 5:17

sang Dios kag tawo] (Mga
Taga-Efeso 2:14, 16)

Subong nga may ara sing anum nga mga paglampos batok sa tawo dira sa balabag, gani may ara anum ka mga kasulbaran sa doktrina sang kaluwasan nga nagalaragway sa trabaho ni Kristo didto sa krus sa diin ang balabag ginkuha.

(1) Ang PANGTANAN NGA SALA sa katawhan nasulbar na pinaagi sa PAG-TUBOS kag SA WALAY LIMITASYON NGA PAGPAMAYAD. Sanglit nga natawo kita tanan nga may makasasala nga kinaiya, kita tanan nasilotan. Natawo kita tanan sa ‘tiyanggihan sing ulipon sang sala’ kag magapabilin nga mga ulipon sa sala (Juan 8:34) tubtub nga nagakinabuhi kita luwas kon batonon naton ang sulosyon para sa sala—ang pagtubos. Ang presyo sing pagbakal sang pagtubos sa aton

amo “*ang dugo* ni Kristo,” isa ka makatalanhaga nga panghambal nga naga-representa sang Iya paghalili nga espirituhanong kamatayon, ang pagpas-an sang aton mga sala didto sa krus (1 Pedro 1:19).

“Sa Iya may pagtubos pinaagi sa Iya dugo, ang kapatawaran sang aton mga paglapas, suno sa mga kamanggaran sang Iya grasya.” (Mga Taga-Efeso 1:7)

Agud matubos ang katawhan sa tiyanggihan sing ulipon sang sala, ginhukman si Jesu-Kristo tungud sang tagsa ka sala sing kada isa sa kalibutan nga nahimo sa bisan kasan-o ukon pagahimoon pa sa bisan kasan-o. Ang ginhalinan sang kinaugalingon nga sala amo ang kabubut-on sang tawo. Ang ginhalinan sang pagsulay sa pagpakasala amo ang

makasasala nga kinaiya, nga napasa halin kay Adan pakadto sa intero nga katawhan (Mga Taga-Roma 5:12). Si Jesu-Kristo nagkuha sang palaligban sang sala para sa bug-os nga katawhan.

Kag Siya ang Iya mismo kaugalingon amo ang pagpakalma tungud sang aton mga sala; kag indi tungud sang aton lamang, kondi tungud man sa *yadtong* bug-os kalibutan. (1 Juan 2:2)

Ining walay limitasyon nga pagpamayad nagahimo sing pagtubos nga handa na para sa intero nga katawhan (1 Pedro 2:24). Apang bisan pa sina, samtang ang tanan puwede maluwas, indi tanan maluwas—yadto lamang ang may pagtoo lamang sa kay Jesu-Kristo lamang ang makabaton sing hingpit nga pagkamatarong sang Dios.

(2) Ang SILOT SANG SALA ginpanas pinaagi sa PAGPAMAYAD. Si Jesu-Kristo amo ang aton nangin halili. Ginhukman Siya tungud sang aton mga sala. Nagbayad Siya sa silot sang sala pinaagi sa pag-antos sing espirituhanong kamatayon “pinaagi sa Iya lawas didto sa krus” (1 Pedro 2:24). Nagbayad Siya sang utang tungud sang aton sala.

Nga nagpanas sing sertipiko sang utang nga nagalakip sang mga dekrito batok sa aton *kag* sa diin nangin mawayon sa aton; kag ginwala Niya ini, nga ginlansang ini sa krus. (Mga Taga-Colosas 2:14)

(3) Bisan ang LAWASNONG PAGKABUN-AG nagaporma sing sagabal sa balabag, sanglit nga ang tawo natawo nga buhi sa lawas apang patay sa es-

piritu. Pinaagi sa Iya trabaho didto sa krus, si Jesu-Kristo nagsangkap sang PAG-KATAWO LIWAT, sa diin ang bisan sin-o nga nagatoo sa Iya “matawo liwat” (Juan 3:7). Pinaagi sa pagkatawo liwat, ang tawo mangin buhi sa espiritu didto sa Dios. “Bisan kon napatay kita tungud sang aton mga paglapas, ginhimo [Niya] kita nga buhi upod sa kay Kristo” (Mga Taga-Efeso 2:5a).

(4) Ang TAWHANONG PAGKAMATARONG sang tawo nasulbar pinaagi sa PAGPABANGUD kag PAGPAKAMATARONG. Sa tion sang kaluwasan, ang Dios nagapabangud ukon nagahatag sing pagkamarong ni Kristo sa aton listahan. Nga suno sa pagpabangud sang pagkamarong sang Dios, ang Dios nagadeklara sang mangin-didapat nga makasasala nga ginpakamarong kag matarong sa Iya itulolok kag mabaton sa Iya kaugalingon (Mga Taga-Roma 4:5).

(5) Ang KARAKTER SANG DIOS naga-

pahamulag sang Dios sa tawo, kay ang Dios amo ang hingpit nga pagkamatarong (1 Timoteo 6:16a). Ang Balaan nga Dios indi puwede nga may relasyon sa patay sa espiritu nga katawhan. Ang Iya perpekto nga katarungan nagadikta nga ang silot tungud sang sala mabayaran. Ang PAGPAKALMA nagasulbar sini nga palaligban: Ang Dios nga Amay napakalma ukon nakontento, indi tungud sang aton mga trabaho, kondi pinaagi sa trabaho ni Jesu-Kristo didto sa krus (1 Juan 2:2).

(6) Ang KAHIMTANGAN SA KAY ADAN sang tawo nagahimo sa iya nga walay kasarang sa pag-angkon sang relasyon sa Dios:

Kay subong nga sa kay Adan ang tanan nagakalamatay, gani amo man sa kay Kristo ang tanan pagabuhion. (1 Mga Taga-Corinto 15:22)

Sa tion sang kaluwasan ang tumuluo ginabutang sa bag-ong KAHIMTANGAN SA KAY KRISTO. Ang tumuluo ara sa paghiusa sa kay Kristo (2 Mga Taga-Corinto 5:17), ang paghiusa nga sa diin indi gid mautod. Ang tumuluo karon nagapakig-ambit sang tagsa ka butang nga kon ano kag ara kay Kristo: Ang Iya kina-buhi nga walay katapusan (1 Juan 5:11–12); Iya pagkamatarong (2 Mga Taga-Corinto 5:21); Iya pagkapili (Mga Taga- Efeso 1:3–4); Iya pagkaanak (Mga Taga-Galacia 3:26); Iya pagkamanunubli (Mga Taga-Roma 8:16–17); Iya pagkapari (Mga Hebreo 10:10–14); Iya pagkahari (2 Timoteo 2:11–12).

Gani ang tanang anum ka mga paghampak batok sa tawo ginkuha na sa walay katubtuban pinaagi sa trabaho ni Ginoong Jesu-Kristo didto sa krus. Ang puwertahan pakadto sa langit nabuksan; sa diin sa makaisa nagtindog ang balabag,

si Kristo nagatindog subong ang solo nga dalan pakadto sa langit.

Si Jesus nagsiling sa iya,
“Ako amo ang dalan, kag ang kamatuuran, kag ang kinabuhi; walay bisan isa nga nagabot didto sa Amay, kondi pinaagi sa Akon.” (Juan 14:6)

Pinaagi sa pagbuhat sang kinaugalingong pagtoo sa kay Jesu-Kristo, ang balabag ginkuha para sa imo, kag ginpasag-uli ka didto sa Dios sa walay katubtuban. Sa tion nga magtoo ka, ang kuwarenta ka mga kahingpitan ginhatag dayon sa imo—kuwarenta ka mga pakamaayo nga nagahimo sang perpektong kaluwasan!

DIVINE NGA MGA SULOSYON BATOK SA TAWHANONG MGA SULOSYON

Ang kada tawo nga naluwas na napabili sang trabaho ni Jesu-Kristo imbis sang iya kaugalingong maayong mga binuhatan agud makontento ang Dios nga Amay. Ang tawo diperpekto, kag walay perpektong plano ang puwede mahimo halin sa diperpekto nga tawo. Kon ang tawo makahimo sang bisan anong butang agud maagum ukon mangin-dapat sa perpektong grasya nga plano, niyan ang kaluwasan mangin diperpekto.

Ang Dios perpekto. Siya amo ang hingpit nga pagkamatarong kag Siya walay pagbaylo, wala nagabaylo (Mga Hebreo 13:8); gani ang pagkamatarong sang Dios indi gid magbaylo kag mangin dimatarong. Ang Dios walay katapusan.

Ang kinabuhi nga walay katapusan dugangan sang pagkawalay pagbaylo kag pagkamatarong nagakahulugan nga wala gid sing nanging tinion, wala gid sing mangin tinion—sa pagkamatuud, wala gid sing mangin *puwede* nga tinion nga ang Dios magdipatas ukon dimatarong sa bisan anong pamaagi. Busa, ang bisan anong butang nga halin sa Dios hingpit nga perpekto.

Ang kaluwasan halin sa Dios; sanglit nga ginplano Niya ang tagsa ka detalye, ang kaluwasan perpekto. Daw sa ano kita ka mapasalamaton sa walay katapusan nga Dios nga nagasangkap sang perpektong plano sang Iya kaugalingong disenyo. Ang pagtuman sang perpektong plano wala sa mga kamut sang tawo, kondi sa mga kamut sang pinasahi nga persona sang bug-os kalibutan, sa kay Ginoong Jesu-Kristo!

Samtang ang Anak sang Dios nakabi-

tay didto sa krus, nagsinggit Siya, “DIOS KO, DIOS KO, NGAA GINPATUMBAYAAN MO AKO?” (Salmo 22:1; Mateo 27:46). Ngaa bala nga ang Dios nga Amay, nga naghigugma sa Anak sa walay katapusan, nagpatumbaya sa Iya didto sa krus? Ang sabat simple lang:

Siya nga wala nakahibalo sang sala *mangin* sala tungud sa aton, agud nga kita mangin pagkamatarong sang Dios sa Iya (2 Mga Taga-Corinto 5:21).

Si Jesu-Kristo amo ang nag-ako sang aton lugar; Iya gindala ang tanan naton nga mga sala sa Iya lawas didto sa krus (1 Pedro 2:24); 1 Juan 3:16). Samtang ginhimo Niya, ang Dios nga Amay nagakinahanglan magsikway sa kay Jesu-Kristo tungud kay ang perpektong pagkamatarong indi puwede magpakig-angot

sa sala. Indi gid naton masugdan sa paghangup ang kadakoon sang paghalili nga pag-antos ni Jesu-Kristo didto sa krus agud masangkap ang aton walay katapusan nga kaluwasan. Sang si Jesu-Kristo nagsinggit, “Natapos na ini,” wala na gid sing iban pa nga puwede pagahimoon (Juan 19:30).

Sa katapusan ang harambalon sa kaluwasan amo ang: Pagapilion mo bala ang diperpektong trabaho ni Kristo didto sa krus nga nagpakontento sa pagkamatarong sang Dios nga Amay, ukon pagapilion mo bala ang imo kaugalingong diperpektong mga trabaho sa masayang nga pagpaninguha agud maagum ang pagpanugot sang Dios? Ginakinahanglan mo magpili sang isa ukon ang isa pa. Ang Balaan nga Kasulatan nagadeklara sing klaro:

Kay tungud sa grasya naluwas

kamo pinaagi sa pagtoo; kag sa sina indi tungud sang inyo mga kaugalingon, *ini amo* ang dulot sang Dios; indi bilang ang resulta sang mga trabaho, agud nga walay bisan isa nga dapat magpabugal. (Mga Taga-Efeso 2:8–9)

Amo ini ang pagkamatahum sang aton dako-kaayo nga kaluwasan—aton ginangkon ining magrasyahong dulot pinaagi sa pagtoo lamang sa kay Kristo lamang (Mga Hebreo 2:3). Ang pagtoo sa kaugalingon sini walay benepisyo, kondi nga ang natungdan sang aton pagtoo, si Jesu-Kristo, pirmi gid may benepisyo. Ano bala ang natungdan sang imo pagtoo sa kaluwasan? Nagasalig ka bala sa imo kaugalingong trabaho—ang pagkasakup sa simbahan, baptismo, pila ka sistema sang moralidad, sang Kasuguan ni Moises,

sang Sermon didto sa Bukid? Ang tanang maayong mga binuhatan nga nahimo na ni bisan sin-o sa bug-os nga kinabuhi nga gin-upod sa dimatupungan nga trabaho ni Kristo nagadugang sa dako kaayo nga *pagbuhin!*

Ang plano sang Dios perpekto sa konsepto kag pagpatuman. Ang plano nga kaluwasan nagalakip sang kada sakup sang Tatlo ka mga Persona sa Isa ka Dios: ang Amay nagplano sang kaluwasan, ang Anak nagtuman sang kaluwasan, ang Ba-laan Espiritu ang nagapahayag sang kaluwasan. Ang balabag nakuha pinaagi sa espirituhanong kamatayon ni Kristo, nga nagbulos sa aton kag nangin aton halili kag manugdala sang sala. Ano pa gid bala ang mas dako nga plano kay sa sini? Apang para sa aton ang kaluwasan simple kaayo: Kondi nga pagabatonon na lang naton ang perpektong dulot sang Dios, ang walay katapusan nga relasyon

sa aton Ginoong Jesu-Kristo.

Apang sa madamong nagbaton sa Iya, sila ginhatagan Niya sing katungud nga mangin mga anak sang Dios, *bisan* sa yadtong magtoo sa Iya ngalan. (Juan 1:12)

Sanglit nga ang balabag nakuha na, ang imo na lamang nga panghunahuna nahanungud sa trabaho kag persona ni Jesu-Kristo ang nagatindog sa tunga mo kag sang Dios, sa tunga mo kag sang kinabuhi nga walay katapusan.

ANG KINABUHI NGA WALAY KATAPUSAN NAGADEPENDE SA ISA KA DESISYON

Nabinagbinag mo bala nga puwede ka makaangkon sang kinabuhi nga walay katapusan sa mismo sini nga segundo? Si Nicodemo, ang Fariseo kag sinsero nga manughimo sing maayo, nagpangamuyo kag nagakadto sa Templo sa madamo nga tinion sa isa ka adlaw, naghatag sing limos sa pobre, kag mapinadayonon nga nagahimo sing maayong mga binuhatan, apang nagkadto pa gid sa kay Jesus agud mangita sang pamaagi sang kinabuhi nga walay katapusan. Si Jesus naghatag sa iya sing sabat sang Iya ginpahayag nga, “Sa pagkamatuid, sa pagkamatuid, nagasiling Ako sa imo, luwas kon ang isa matawo liwat, indi siya

makakita sang ginharian sang langit” (Juan 3:3).

“Paano bala matawo ang isa ka tawo kon tigulang na siya?” Si Nicodemo natingala. Niyang si Jesus nagpaathag sing klaro kon paano matawo liwat didto sa ginharian sang Dios:

“Bisan pa sina, ang Anak sang Tawo pagabayawon; agud nga ang bisan sin-o nga magtoo sa Iya may kinabuhi nga walay katapusan.” (Juan 3:14b–15)

Ang kinabuhi nga walay katapusan naga-sugod didto sa krus—pinaagi sa pagtoo sa kay Jesu-Kristo subong imo Manluluwas. Kinaugalingon bala nga nagtoo ka sa Iya?

Ang pamangkot *indi* nga: Sakup ka bala sang isa ka simbahan? Respitado ka bala nga sakup sang katilingban? Natawo ka bala sa isa ka Kristohanon nga pani-

malay? Sinsero ka bala sa imo mga ginatoohan? Ang pamangkot *amo* nga: Magatoo ka bala sa kay Ginoong Jesu-Kristo subong imo kinaugalingong Manlu-luwas? Amo ini ang solo nga pamaagi agud makabaton sang dulot nga kinabuhing walay katapusan, ang solo nga pamaagi nga makasulud ka sa pamilya sang Dios, ang solo nga pamaagi nga makakadto ka sa langit!

KASIGUROHAN SA WALAY KATAPUSAN

Sa makaisa nga kinaugalingon ka nga nagtoo sa kay Kristo, ara ka na sa plano sang Dios sa walay katapusan. Wala gid sing bisan ano nga makapakuha sang perpektong dulot sining dako-kaayong kaluwasan. Ginakinahanglan mo mahangpan nga ang kaluwasan sa maka-

isa lamang, kag magapabilin sa walay katubtuban. Tubtub nga mahangpan mo ang kasigurohan sa walay katapusan kag magtoo nga magakinabuhi ka upod sa Dios sa walay katubtuban, indi ka gid magtubo sa Kristohanon nga kinabuhi.

May mga madamong mga pamaagi sa diin ining kasigurohan sa walay katapusan ginlaragway diri sa Pulong sang Dios.

Una, ang kasigurohan sa walay katapusan MAPANGATARUNGANON. Kon ang Dios naghatag sing pinakadako didto sa krus, ano bala ang Iya pagahimoon para sa aton karon nga mga sakup na kita sang Iya pamilya? Ina lamang sa diin puwede malaragway subong *mas dako pa gid kay sa pinakadako!*

Siya nga wala nagpaiway sang Iya kaugalingong Anak, kondi nagtugyan sa Iya tungud sa aton tanan, paano bala nga

indi man Siya maghatag sing maalwan sa aton sang tanan nga mga butang? (Mga Taga-Roma 8:32)

Ginakinahanglan mo binagbinagon nga si Jesu-Kristo, ang perpektong dulot sang Dios, ginhatag sa aton sang kita mga kaaway sang Dios—sang kita mga makasasala, patay sa espiritu kag nangin-dapat sang silot.

Kay kon sang mga kaaway pa kita [sang Dios], ginpasag-uli kita sa Dios pinaagi sa kamatayon sang Iya Anak, labi pa gid, nga ginpasag-uli, maluwas kita pinaagi sa Iya kinabuhi. (Mga Taga-Roma 5:10)

Kon ginpasag-uli kita sa Dios sa tinion nga

kita halos pa mangin-dapat, magahatag bala Siya sa aton sing bisan anong *magamay* kay sa *pinakalabi* karon nga kita natawo na liwat? Dira sa Mga Taga-Roma, si Pablo nagasiling nga *indi!*

Sa pagpangatarungan, niyan, ini imposible gid para sa aton nga dulaon ang aton kaluwasan tungud kay ang Dios nakahatag sa aton sing *labing dako pa kay sa kaluwasan*. Subong mga sakup sing pamilya sang Dios ara kita sa idalum sang mas-dako pa gid nga pag-amuma sang Dios. Sang nagahatag Siya sa aton sang dulot nga kinabuhing walay katapusan, Iya ginsigurado ina nga dulot para sa bug-os nga eternidad.

Ikaduha, may ara kita sing KAHIMTANGAN SA KAY KRISTO nga amo ang walay katapusan sa kinaiya sini. Sa tion nga batonon ta si Kristo subong Manlu-luwas, ginpasulud kita sa paghiusa sa Anak sang Dios. Sa makaisa nga naka-

sulud na kita sa paghiusa sa kay Kristo pinaagi sa baptismo sang Balaan Espiritu, nahiusa kita upod sa Iya sa walay katubtuban.

Kay pinaagi sa isa ka Espiritu ginbaptismohan kita tanan sa isa ka lawas, bisan kon mga Hudiyo ukon mga Griyego, bisan kon mga ulipon ukon hilway, kag kita tanan ginpainum sa isa ka Espiritu.
(1 Mga Taga-Corinto 12:13)

Nakita mo, ang pagka-Kristohanon indi relihiyon. Dira sa relihiyon, ang tawo nagapanglaghap agud makaagum sing pagpanugot sang Dios pinaagi sa iya kaugalingong mga trabaho, apang ang pagka-Kristohanon amo ang walay katapusan, ang kinaugalingong relasyon sa Dios. Kon nabaton mo na si Jesu-Kristo

subong imo Manluluwas, niyan may ara ka na walay katapusan nga relasyon sa Dios; ginbaton ka na “dira sa Hinigugma” (Mga Taga-Efeso 1:6). “Ang Hinigugma” amo ang patumod sa kay Jesu-Kristo subong ang natungdan sang walay katapusan nga gugma sang Amay. Subong isa ka tumuluo ni Ginoong Jesu-Kristo, ikaw man manugbaton sang parehong walay katapusang gugma. Indi katingalahan nga si Pablo nagpahayag nga:

Kay nakombensi ako nga indi man ang kamatayon indi man ang kinabuhi, indi man ang mga anghel, indi man ang mga punoan, indi man ang mga butang karon, indi man ang palaabuton nga mga butang, indi man ang mga gahum, indi man ang mga kataasan, indi man ang kadadalman,

indi man ang bisan anong tinuga nga butang, ang sarang makapahamulag sa aton sa gugma sang Dios, nga ara sa kay Kristo Jesus nga aton Ginoo. (Mga Taga-Roma 8:38–39)

Ang ikatatlo nga konsepto dira sa doktrina sang kasigurohan sa walay katapusan amo nga ang tumuluo ara sa KAMUT SANG DIOS.

Kon mapukan siya, indi siya
ihaboy sing gulpi;
Tungud kay ang GINOO amo
ang Isa nga nagakaput
sang iya kamut. (Salmo
37:24)

Sang nagtoo ka sa kay Jesu-Kristo, gin-kaptan ka sing malig-on sa Iya pag-

kagamhanan sa tanan nga kamut! Puwede nga buy-an mo ang Ginoo sa madamo nga mga tinion, apang wala gid sa maka-isa nga ginbuy-an ka ni Jesu-Kristo. Gin-kaptan ka sang kamut sang Dios sa walay katubtuban.

“Kag nagahatag Ako sa ila sang kinabuhi nga walay katapusan, kag indi na gid sila mawala; kag walay bisan isa nga makaagaw sa ila sa Akon kamut.” (Juan 10:28)

Ika-apat, ang PAGKAMATUTUM SANG DIOS nagapasigurado sa aton sang walay katapusan nga palaabuton. Ang kaluwasan sang tagsa ka tumuluo nasigurado na pinaagi sa walay katapusan, walay pagbaylo nga mga kinaugalian sang Dios. Bisan pa kon magsiling kita nga wala na kita nagatoo, ang Dios nagapabilin nga

matutum. Ang pagpadayon sang aton kaluwasan wala nagadepende sa kon sin-o kag ano kita. Wala kita sing importansya! Subong mga tumuluo, bisan kon kita mga maayo ukon malain, moral ukon dimoral, matutum ukon dimatutum—indi ini kon sin-o kag ano kita. Ang aton kaluwasan nagadepende sa kon sin-o kag ano ang Dios. Ang Dios nga Amay, Dios nga Anak, kag Dios Balaan Espiritu permanente nga nagaistar sa aton kag ang Dios indi makapanghiwala sang Iya kaugalingon.

Kon kita mga dimatutum, Siya nagapabilin nga matutum; kay indi Niya mapanghiwala ang Iya kaugalingon. (2 Timoteo 2:13)

Sa tapos ang kaluwasan puwede naton mapasubo kag mapalong ang Espiritu pinaagi sa sala (Mga Taga-Efeso 4:30; 1

Mga Taga-Tesalonica 5:19), apang ang Dios nakahimo sang pagsangkap sa Iya plano sang grasya para sa tagsa ka sala sa Kristohanong kinabuhi—bisan kon ano man ka dako.

Kon ituad ta [ngalanan didto sa Dios nga Amay] ang aton mga sala, matutum kag matarong Siya sa pagpatawad sa aton sang aton mga sala kag magtinlo sa aton sa tanan nga pagkadimatarong. (1 Juan 1:9)

Ikalima, ang PAGKALABAW NGA KAMANDOAN SANG DIOS ginakinahanglan pagaton-an. Ano bala ang pagkalabaw nga pagbuut sang Dios sa kaluwasan? Indi luyag sang Dios nga ang bisan sin-o mawala kondi nga ang tanan dapat makalambot sa pagbaylo sang panghuhuna nahanungud sa persona ni

Kristo (2 Pedro 3:9). Ang Dios nga Amay nagsangkap sang perpektong plano para sa aton walay katapusan nga panublion.

Dayawon ang Dios kag Amay sang aton Ginoong Jesu-Kristo, nga suno sa Iya dakong kalooy natawo kita liwat sa buhi nga paglaum pinaagi sa pagkabanhaw ni Jesu-Kristo halin sa pagkapatay, agud *mag-agum* sang panublion *nga amo* ang dimadinulunton kag walay dagta kag indi madula, nakareserba sa langit para gid sa imo, nga ginprotektahan sang gahum sang Dios pinaagi sa pagtoo para sa kaluwasan nga handa ipahayag sa katapusan nga tinion. (1 Pedro 1:3–5)

Ang ika-anum nga kahimtangan para sa kasigurohan sa walay katapusan makitan sa GRIYEGONG MGA KAPANAHONAN SANG BERBO sa kaluwasan nga mga dalanon sang orihinal nga lenggwahe sang Bag-ong Katipan. Sa Mga Taga-Efeso 2:8, ang perpektong kapanahonan sang Griyego nga berbo (sozo), “agud maluwas ukon mapalingkawas,” nagapakita nga ang aksyon sang berbo, “naluwas na,” ginkompleto nga may mga resulta nga nagapadayon sa walay katubtuban.

Kay paagi sa grasya naluwas kamo [naluwas sadtong nagligad nga may resulta nga nagapabilin nga naluwas sa walay katubtuban]. (Mga Taga-Efeso 2:8a)

Isa pa ka bersikulo nga nagapamatuud sang pagkawalay katapusan sang aton

seguridad nagagamit sang aorist nga kapanhonan sang berbo sozo.

“[Sa isa ka punto sang tinion] magtoo sa kay Ginoong Jesus, kag maluwas ka [sa maka-isa].” (Mga Binuhatan 16:31)

Ikapito, may konsepto kita sang PAMILYA. Sa makaisa nga natawo ka sa pamilya sang Dios, ara ka na gid pirmi sa pamilya sang Dios.

Kay kamo tanan mga anak sang Dios pinaagi sa pagtoo sa kay Kristo Jesus. Kag kamo tanan nga nabaptismohan sa kay Kristo ginsukloban ang inyo mga kaugalingon kay Kristo. Walay Hudiyo kag wala man sing Griyego, walay ulipon kag wala man sing hil-

way nga tawo, walay lalaki kag wala man sing babayi; kay kamo tanan isa sa kay Kristo Jesus. (Mga Taga-Galacia 3:26–28)

Ang ikawalo, may malapit nga kaang-tanan sa konsepto sang pamilya nga amo ang konsepto sang LAWAS.

Siya [Kristo] amo ang ulo sang lawas, ang simbahan [ang tanang mga tumuluo]. (Mga Taga-Colosas 1:18a)

Ang kada tumuluo sakup ukon parte sang lawas ni Kristo sa walay katubtuban.

Kag ang mata indi makasiling sa kamut nga, “wala ako nagakinahanglan sa imo”; ukon sa liwat ang ulo [Kristo]

sa tiil [mga tumuluo], “wala ako nagakinahanglan sa imo.”
(1 Mga Taga-Corinto 12:21)

Sa pang-ulih, ang aton kaluwasan GINSELYOHAN sa walay katapusan sang Balaan Espiritu. Ang selyo amo ang garantiya para sa proteksyon kag sa walay katalagman nga pagpalingkawas. Ang Balaan Espiritu ginhatag sa kada tumuluo sa tion sang kaluwasan agud maggarantiya sang aton proteksyon sa sini nga tinion kag sa walay katalagman nga pagpalingkawas didto sa langit sa eternidad.

Sa Iya, kamo man, sa tapos makapamati sing mensahe sang kamatuuran, ang ebanghelyo sang inyo kaluwasan— nga nagtoo man, ginselyohan kamo sa Iya sang Balaan Espiritu sing saad, nga gin-

hatagan subong isa ka pangako nahanungud sang aton panublion, nga may pananaw sa pagpanubos sang *kau-galingong* panag-iyahan sang *Dios*, sa pagdayaw sang Iya himaya. (Mga Taga-Efeso 1:13–14)

ANG MGA TUMULUO ARA SA PERPEKTONG PLANO SANG DIOS

May madamo kaayo nga nakatagong mga kamatuuran nga natuman sang Dios—madamong mga detalye sang kaluwasan nga ayhan wala mo mahangpan. Ang tanan nga ginahimo sang Dios ginahimo Niya sing matutum, agud nga ang imo kaluwasan indi magdepende sa kon ano ang imo ginahimo ukon ano ang imo

ginabatyag. Bisan pa nga may kuwarenta ka mga kahingpitan nga ginahatag ang Dios sa imo sa tion nga ikaw magtoo sa kay Jesu-Kristo, ginakinahanglan mo ang madamong mga tinuig agud madiskubrihan mo sila tanan sa Balaan nga Kasulatan, apang ining “bag-ong mga butang” ara tanan didto!

Busa kon ang bisan sin-o nga tawo ara kay Kristo, bag-o *siya* nga tinuga; ang daan nga mga butang nagtaliwan na; yari karon, ang bag-ong mga butang nag-abot. (2 Mga Taga-Corinto 5:17)

Ang “bag-ong mga butang” indi ang pila ka pagbaylo sang hayag nga pamatasan; indi sila ang bag-ong ginabatyag, ukon bisan ang isa ka butang nga imo na ginbuyan subong isa ka tumuluo. Ining bag-ong

mga butang amo ang kuwarenta ka mga pakamaayo nga imo mabaton sa tion sang kaluwasan. Halin sa tion sang kaluwasan, ang Dios may plano para sa imo. Kabahin ka sang perpektong plano sang Dios kag ang natungdan sang Iya walay katapusan nga gugma kag pag-amuma.

Ayhan nabaton mo na ang perpektong dulot sang Dios nga si Jesu-Kristo subong Manluluwas, apang ikaw sa sini nga tion isa ka nawad-an sing paglaum nga Kristohanon. Ayhan may mga pagduhaduha ka sa imo hunahuna nahanungud sang tagsa ka aspeto sang imo kinabuhi kag nakabatyag nga nausikan mo ang kadamoan sang imo tinion sa sini nga kalibutan. Ayhan nalibog ka nahanungud sang imo katuyoan sa kinabuhi. Niyan, hinumduma ini: Buhi ka pa, kag tubtub nga buhi ka pa, ang Dios may perpektong plano para sa imo.

Bisan pa kon ano ka kubos ukon ano

ka taas ang imo mga kahitaboan, ang Dios may katuyoan para sa imo. Ang imo madangatan mapahayag samtang nagatubo ka sa pagkaespirituhanon. Sa pagbaton sang perpektong dulot sang Dios, ang makadalayaw nga kinabuhi nga may kahulugan, katuyoan, kag kaathagan nagahulat sa imo. Ini nga katuyoan puwede mahibaloan kag mahangpan pinaagi lamang sa ihibalo nahanungud sang Pulong sang Dios. Ang walay ihibalo nga Kristohanon isa ka piyerdihan nga Kristohanon. Ang perpektong plano sang Dios para sa tumuluo nagasugod sa doktrina sang Bibliya kag matapos sa doktrina sang Bibliya. Ang imo hangkat sa Kristohanong kinabuhi amo nga kilalahon si Jesu-Kristo.

Apang magtubo sa grasya
kag ihibalo nahanungud sa
aton Ginoo kag Manluluwas

nga si Jesu-Kristo. Sa Iya *amo*
ang himaya, karon kag tubtub
sa adlaw sang eternidad.
Amen. (2 Pedro 3:18)



Ang kompletong lista sang kuwarenta ka mga kahingpitan nga ginhatag sa tagsa ka tumuluo sa tion sang kaluwasan makit-an sa *Ang Plano sang Dios*, ni R. B. Thieme, Jr., nga handa na sa R. B. Thieme, Jr., Bible Ministries.

PALAKAT SA PANANALAPI

Wala sang bayad para sa bisan anong materyal halin sa R. B. Thieme, Jr., Bible Ministries. Ang bisan sin-o nga nagahandum sang pagpanudlo sa Bibliya makabaton sang amon mga bantalaan kag sang mga narekord sa audio kag video nga wala sing obligasyon. Ang Dios nagasangkap sing doktrina sang Bibliya. Kami nagahandum nga ipakita ang Iya grasya.

Ang R. B. Thieme, Jr., Bible Ministries isa ka grasya nga buluhaton sing pagpangalagad kag intero nga nagapanghikot sa boluntaryo nga mga amot. Kon ang pagkamapasalamaton para sa Pulong sang Dios ang nagaengganyo sa tumuluo agud maghatag, siya may pribilehiyo sang pag-amot para sa pagpalapnag sing doktrina sang Bibliya.

SA PAGTOLON-AN NGA MGA PAGTOON SA BIBLIYA

Doktrina sang Bibliya, ang kabilogan sang pagpanudlo nga ginkuha halin sa literal nga pagpakahulugan sang Balaan nga mga Kasulatan, amo ang talaksan para sa espirituhanong kamatuuran. Ang pagtoon sa Bibliya nagasangkap sang espirituhanong nutrisyon para sa Kristohanon (Mateo 4:4).

Ang importansya sing doktrina sang Bibliya indi puwede pasobrahan sing pagpatalupangud (Salmo 138:2). Ang Dios nagasugo sang Kristohanon nga magbaylo sa sulud (Mga Taga-Roma 12:2). Ini nga pagbaylo nagakinahanglan sang kada adlaw nga pagbag-o sang hunahuna pinaagi sa pagtoon kag pag-aplikar sang Pulong sang Dios (2 Mga Taga-Corinto 4:16; Mga Taga-Efeso 4:23).

Sa madamong mga tinuig ang sa pagtolon-ang mga klase sa Bibliya nga gintudlo ni R. B. Thieme, Jr., nakasangkap sang espirituhanong pagkaon para sa iya kongregasyon. Ang mga bantalaan kag mga ginrekord sa audio kag video sang iya mga pagpanudlo nahanda na sa wala sing bayad ukon obligasyon. Para sa pag-order kag sa impormasyon, palihog sulat ukon tawag sa Ministries ukon magbisita sa website. Ang *Katalogo sang sa Pagtolon-an nga mga Pagtoon sa Bibliya* (sa English) igasangkap sa tion nga pangayoon.

R. B. THIEME, JR., BIBLE MINISTRIES

P.O. Box 460829
HOUSTON, TEXAS 77056-8829

www.rbthieme.org
713-621-3740

ANG TAGSULAT

ROBERT B. THIEME, JR. (1918-2009), nagpabilin nga makahuluganong tingog sang pagka-Kristohanon sa bug-os nga kalibutan. Ang iya mapisanon kag mahimulaton, maathag nga pagpanudlo nakabase sa kinaunahan nga mga panghambal sang Balaan nga Kasulatan sa kapawa sang makasaysayang konteksto sa diin ang Bibliya ginsulat. Ang iya makabag-o nga mga sistema sang bokabularyo, mga paglaragway, kag bibliyanhon nga mga kategorya klaro nga nagapahibalo sang wala nagakasayup nga mga kamatuuran sang Pulong sang Dios. Si Thieme may narekord sang sobra sa onse ka libo ka oras sang mga wali kag nagbantala sang sobra sa isa ka gatos ka mga libro nga nagalakip sang madamo nga mga bersikulo sang Bibliya.

Si Thieme naggradwar sa Unibersidad sang Arizona (Phi Beta Kappa) kag Dallas Theological Seminary (summa cum laude). Ang iya mga pagtoon sa seminaryo nauntat tungud sang katungdanan sa serbisyo militar sang Ikaduha nga Gira sa Bilog nga Kalibutan sa panahon nga diin ginpataas siya sa ranggo sang lieutenant colonel sa United States Army Air Corps. Pagkatapos makompleto ang iya buluhaton sa paggradwar sang 1950, nangin pastor siya sang Berachah Church sa Houston, Texas. Ang iya masangkad kaayo nga kahanasan sa Griyego, Hebreo, teyolohiya, istorya, kag pagpangusisa sang teksto nagsangkap sang pundasyon para sa iya mahangkaton kaayo nga propesyonal nga kinabuhi sang pagtoon kag pagtudlo sang Pulong sang Dios. Si Thieme nagretiro subong pastor sang Berachah Church pagkatapos sang singkwentay tres ka tuig sang matutum nga pagpangalagad.

